

Ediu ulteriuras ovras da Pader Baseli Berther

Presentaziun dil 2. tom en claustra a Mustér



n (anr/gc) **Bunamein in miez tschentaner ha il historiograf tuatschin, Pader Baseli Berther (1858-1931), viviu ed operau sco benedictin a Mustér.** Perquei ha il Forum cultural da Tujetsch presentau venderdis sera il secund tom cun ovras da pader Baseli Berther davart la vischnaunca da Muster e la Cadi en la sala dalla claustra. La vernissascha, stada era in omagi al historicist da Tujetsch, ei vegnida enramada da bellezza canzuns dil Chor mischedau Surrein sut la bitgetta suverana da Retus Giger. Igl ei stau in'occurrenza che ha dau e purtau bia.

Zun activ Forum cultural

Il Forum cultural Tujetsch exista dapi 1997. Per siu giubileum da diesch onns ei igl emprem tom cun ovras da Pader Baseli Berther cumpariu avon dus onns. Tenor il premurau president dil Forum, André Schmid, che ha fatg in cordial beinvegni, s'engascha quell'instituziun per promover tuttas spartas culturalas en vischnaunca e sestenta era da sensibilisar vischinas e vischins persuerter. Ins hagi il sustegn activ da ca. 50 persunas e da 100-150 fautors che han gidau a realisar acziuns da gener divers. Il Forum cultural tuatschin seigi ina petga culturala che detti biars impuls e dispona era d'ina vasta purschida sin sia pagina d'internet. Tschella sera ha il Forum era intermediau in film da Lucas Berther, Sedrun/Rapperswil, che retegn bellezza ed impressiunonts maletgs da «Dis dalla stad 1937 en Surselva». Cuntrada, vitgs sco era vischinas e vischins vid la lavur en Sursassiala vegnan mussai. Tgei prezius document!



André Schmid (sen.) president dil Forum cultural Tujetsch e Tarcisi Hendry, grond promotur dall'ediziun d'ovras da Pader Basel! FOTO G. CAPAUL

Il historiograf tuatschin

Tarcisi Hendry, grond promotur cultural tuatschin e sefatgs meriteivels era per la novissima ediziun, ha allegau il vast radius d'acziun da pader Baseli Berther sco spiritual, scolast, scribent, cronist, historiograf e conservader. Il secund tom da sias ovras ensiari contribuziuns davart la vischnaunca da Muster sco era nur dil cumin dalla Cadi. Plinavon ein cuntenidas, en quei volumen ina biografia dil

pader-historicist e poesias dad el. Quei che pader Baseli ha scret e descret vegnevi ord il pievel ed era legiu stedi e bugen da quel.

Fundatur dalla Biblioteca romontscha en claustra

Pader Vigeli Monn, vischin tuatschin e decan, presenta cun veseivel plascher e bia satisfacziun la veta ed igl operar dil confrar ord sia Val, pader Baseli Berther. El ha dau investa ella situaziun dalla claustra da Mustér, cu pader Baseli ei entaus leu 1883 suenter che la restauraziun dil monasteri fageva progress muort l'aboliziun dalla lescha cantunala che scumandava da recepir novizs buca Grischuns. Pader Baseli Berther ei staus igl emprem conventual grischun suenter la restauraziun. El ha instruiu latin, franzos, dau ducrina e staus biars onns prefect. El eri stregns (el fuva officier), mo cunscienzius, exacts, in bien pastur dallas olmas, in summa in spiritual e conventual perschadiu.

Il grond meret da pader Baseli Berther ei denton la fundaziun dalla Biblioteca romontscha en claustra a Mustér 1883. Quella ha el endrizzau, tgirau cun pissiun e rimnau mellis cudischs. Dapi siu temps ha la Biblioteca romontscha en claustra giu sis bibliotecaris. Da quels fuvan buca meins che quater Tuatschins (pader Baseli, pader Vigeli, pader Placi Berther e dapresent pader Vigeli Monn — sper ils dus ulteriurs pader Ursicin Simeon e pader Ambros).

Mintgacass ha quella presentaziun da veta ed ovra da pader Baseli Berther documentau la rihezia culturala dalla Val Tujetsch en special e dalla Cadi en general. Igl autur ha dau essenzialmein access ed expressiun a quei. Lien consista sia prestaziun historica-culturala per propi.